



# ज्वजलपा वाःपौ

JWOJALAPA NEPALBHASA WEEKLY

दै: ६ ल्या: २३ पूर्णाङ्क: ७५

ने. सं. ११३६ थिलागा दुतिया आइतवा:

२०७२ पुस १२ गते आइतवार (Dec- 27, 2015)

मू: ८/- (च्यातका)

## वर्तमान परिस्थितिइ ज्यापुतय्गु च्यूता:



ज्यापु महागुथि केन्द्रिय समिति बंगु थिलागा पारु (पुस ११ गते) वर्तमान राष्ट्रिय राजनैतिक परिस्थितिइ भीगु च्यूता: विषय छगू अन्तरक्रिया ज्याभव: या:गु दु । केन्द्रिय नायो राजभाई जक:मिया नायोसुइ जूगु उगु ज्याभवलय् येँ महानगरपालिका समितिया नायो रामबहादुर महर्जन लसकुस यानादीगु ख:सा मूछ्याञ्जे न्हुछेकाजी महर्जन ज्याभव: न्ह्याकादीगु ख: ।

केन्द्रिय नायो राजभाई जक:मिं न्ह्यव्व:गु कार्यपत्रय् धयात:गु दु ने.सं.११३३ सं जूगु ज्यापु महागुथिया स्वक्व:गु राष्ट्रिय महाधिवेशन "पहिचानया संविधान ज्यापु जातिया अभियान" नारा क्व:छ्यगु ख: । थौं न्हूगु संविधान पिहांवल । व संविधानय् भीसं आसा यानाकथं भीत संविधान सभाया चुनावया इलय् राजनैतिक पार्टीतसें प्रतिवद्धता प्वकूकथं संविधान निर्माण जूगु खनेमदु । भीगु पहिचान मदु । अथे जूगुलिं गुगु नं कथं संविधान सशोधन याना: भीगु म्हसीका दुगु

नेवा: स्वायत्त प्रदेशया अधिकार भीत दयेमा:, भीगु प्रदेशय भीगु भाय् नं सरकारी माध्यम भाय्कथं तत्काल छुयले दयेमा धैगु भीगु स: ख: ।

वय्कलं अधोपित नाकाबन्दी याना: आपूर्ति व्यवस्था संकट अवस्थाय् लानाच्वंगुलिं सरकारं आपूर्ति व्यवस्था सहज याना: कालोबजारी नियन्त्रण यायेमा: । मधेश आन्दोलनया बारे नं च्यूता प्वकादिसें तराई मधेसय् जुयाच्वंगु आन्दोलन राजनैतिक आन्दोलन ख: । उकिं आन्दोलनरत दलनाप याकनं राजनैतिक वार्ता याना इमिगु जायज माग प्वका: देशय शान्त सुरक्षा कायम यायेत नं इनाप यानात:गु दु । केन्द्रिय नायो राजभाई जक:मिं न्ह्यव्व:गु अवधारणा पत्रया बारे त्वंवायेगु भोलय् ज्यापु महागुथि किपू नगर समितिया नायो नजरराम महर्जन थ्व अवधारणापत्रय् वर्तमान परिस्थिति भीगु च्यूता: जक प्वका:त:गु दु, आ: छु याना वनेगु धैगु छुं

हे खनेमदु । थ्व संविधानं भीत छुं हे अधिकार विइगु ला न्हापा बियात:गु अधिकार नापं क्वपाला ब्यूगु दु । भीगु जक मखु मधिसे, आदिवासी जनजाति, थारु सकसियागु अधिकार क्वपाला ब्यूगु हुनिं मधेसीत सचेत जुया आन्दोलन यानाच्वंगु प्यला दत । अय्ं सर कारं वार्ताया नामय् ई बर्बाद याना जनतायात दु:ख बियाच्वन । गबलेतक काठमाडौंलय् आन्दोलन जुइमखु उबलय् तक देसय् छुं निर्णय जुइमखु । काठमाडौंया आदिवासी मध्ये दकलय् अप्व: जनसंख्यादुपिं ज्यापु जाति आन्दोलनया घोषणा याना आन्दोलनय् वनेमाल धैगु बिचा: प्वका:दिल ।पूर्व राज्यमन्त्री दिलिप महर्जन विशेष परिस्थितिइ नेपा: असफल राष्ट्र मजुइकेत बाध्यतावश थ्व संविधान व:गु ख: । उकिं थ्व संविधानय् लिपा नं संशोधन याना वनेफुगुलिं भीपिं छधि छप्पं जुया राजनैतिक दलतय् सचेत यायेमा:गु खं कनादिल । त्यं २ पेजय्

भिं  
तु  
ना



थुगु वा:पौया सल्लहकार नेवा: पत्रकार राष्ट्रिय दबूया केन्द्रीय नाय: **श्रीकृष्ण महर्जन** भिंनिक्व:गु ज्यापु दिवसया लसताय् थुगुसीया पत्रकारितापाखे **ज्यापु प्रतिभा सिरपा:** त्याकादीगुलिं भिंतुना देछासें पत्रकारिता ख्यालय् अभ् अक्व: ज्या याना वने फयेमा: धका: भिंतुना देछायाच्वना ।

**ज्वज्वलपा वा:पौ सकल ज:**

निखासी, न्हूबजा:, कीर्तिपुर-३

भिंतुना



थुगु वा:पौया संवादाता **भरत महर्जन**या **रेशमा महर्जन**लिसे जूगु भिं इहिपा:या सताय् भिंतुना देछासें त्यपु जीवन सुथां लायेमा धका: कामना यानाच्वना ।

**ज्वज्वलपा वा:पौ**

**सकल ज:**

निखासी, न्हूबजा:, कीर्तिपुर-३



## ज्ञाजलपा वा:पौ

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweb@gmail.com

### सम्पादकिय

## नेवा:तय्सं क्यनेमा:गु सरोकार

न्हूगु संविधानयात कया स्वनिग:या आदिवासी नेवा:तय्सं खास हे चासो क्यनाच्वंगु खने महु। न्ह्यागुसां संविधान वल वा संविधान मवायाच्वंगु इलय् संविधान वल व हे त:धंगु खँ ख: धका: न्हूगु संविधानय् दुथ्यानाच्वंगु धारानिसें नेवा:तय्गु अधिकारया वारे उल्लेख जुया मच्वंगु जूसां नेवा:तय्सं सरोकार क्यनाच्वंगु खने महु।

बास्तवय् न्हूगु संविधानय् नेवा: धका: गनं नं उल्लेख यानात:गु महु। वरु खस आर्य धका: ब्रम्हु, क्षेत्री, ठकुरी, दशनामी व सन्यासि धका: उल्लेख यानात:गु दु। अले नेवा:तय्गु भाय् अर्थात नेपा:या गुलि नं मातृभाषात दु (खय् भाय् बाहेक) व फुक्क भासं आख: व्वंके दइ धका: च्यात:गु दु तर राज्य जिम्मेवारी कयात:गु महु। उकिया अर्थ राज्य नेवा: भासं आख: व्वंकेगु व्यवस्था यायेमा:गु बाध्यकारी अवस्था महु। अथे हे प्रदेशय् बहुसंख्यक समुदायपाखें ल्हाइगु भाय्यात नं प्रदेश स्तरया भाय्या रुपय् सरकारी कामकाजया रुपय् नालाकायेफइ तर कानुन दयेका धका: उल्लेख यानात:गु दु। जब कि खय् भाय् केन्द्रनिसें गां गामय् तकं सरकारी कामकाजया भाय् धका: सुनिश्चित यायेत तर मेमेपनिगु भाय्यात धा:सा थाय् तकं वियात:गु महु।

उकिं भाषिक समुदायया रुपय् न्ह्य:ने वयाच्वंगु अले भाय् हे म्हसीका ख: धका: तायेका वयाच्वं पिं नेवा:तय्सं आ: जारी जूगु संविधानयात कया च्यूता: प्वंका थ:थ:गु थासय् सहलह व्याकेमा:गु अवस्था दु।



भिनिक्व:गु ज्यापु दिवसया भवलय् वंगु शुक्रवा: यें जूगु सांस्कृतिक भाँकी सहितया न्यालीइ सहभागी जुयादीपिं किपूया थांवहा: दाफा खल:या दुज:पिं

## ज्यापु दिवस अले भी नेवा:



-नृपेन्द्रलाल श्रेष्ठ-

नेपा: देशय् गुलिखे जात्रापर्वत ता: ई न्ह्यवनिसें थौतक नं न्ह्याना वयाच्वंगु दनिसा गुलिखे दिनावनेगु क्रमय् दु। थुकथं जात्रापर्वत न्ह्याकेगु भवलय् नेवा: जाति दुने ज्यापु समुदायया यक्व हे भूमिका दु।

बाजं थाना:, च:ख: दयेका:, च:ख: साला:, भवय् ज्वरे याना: आदि थी थी ज्या याना: थी थी जात्रापर्वया अस्तित्वयात ज्यापु समुदायं सम्भव दयेकात:गु खनेदु। अथेजुया: ज्यापु समुदाययात छगू सांस्कृतिक पक्षलिसे सतीगु समुदाय कथं कायेगु या:।

पेशा कथं ज्यापु समुदाययात बुँज्या याइगु समुदाय कथं म्हस्यु। नेवा:तय्सं अन्तयात पूजा याइगु दिन, विशेष कथं अन्तलिसे तप्यंक स्वापू तया: नेवा: समाजं सांस्कृतिक पर्व न्यायेका वयाच्वंगु दिं य:मरि पुन्हियात ज्यापु समुदायं वि.सं. २०६२ निसें ज्यापु दिवस कथं हनेगु या:गु ख:। ज्यापु संस्कृति विकास कोष नीस्वना: उगु सालय् न्हापांगु ज्यापु दिवस हंगु ख:। लिपा २०६४ सालय् वया: ला नेपाल सरकारं नं थुगु दिनयात महत्व विया: सार्वजनिक विदा हे विल। उबलेनिसें हे प्रधानमन्त्री नं ज्यापु दिवसया समारोहस ब्वति कायेगु यानाह:गु खनेदु।

य:मरि पुन्हिया दिनस ज्यापु दिवसया त:जिगु हे समारोह जुइ। नेपाल सम्बतया न्हूगु दँ न्ह्याइगु म्हपुजाकुन्हु नेवा:तय्गु बृहत न्याली पिहांवइ थें य:मरि पुन्हि कुन्हु स्वनिग:या थीथी थायलिसें टिष्टुङ तकं नं ज्यापु

दिवसया न्यालीइ ब्वति का: वयाच्वंगु दु। न्यालीया भवलय् दलंढ:म्हेंसिनं ब्वति काइगु छगू बांला:गु पक्ष ख:। तर नेवा:तय्गु सरोकार अथवा अधिकार या भवलय् आन्दोलन, सभा, समारोह वा मेगु ज्याभव: जुइगु इलय् थथे सडकय् व:गु खनेमहु।

ज्यापु समुदायं थी थी नेवा: जात्रापर्व, उत्सव आदिइ देय् हे थ्वयेक सांस्कृतिक रुपं धिमेय्, भुस्याहा थाना: राष्ट्रयात थ:गु म्हसिका क्यनेधुकूगु दु। आ: ई हिलावंगु दु।

हिलावंगु ईलिसे सांस्कृतिक ख्यलय् तमक्यंसे ज्यापु समुदाय नं नेवा:तय्गु अधिकार प्राप्तिया विषयस नं सचेत जुया: न्ह्या:वनेफ:सा अभ् नं बांलाइ। ज्यापु दिवस धका: येंया ज्यापुतय्सं जक न्ह्याका वयाच्वंगु खनेदु। थुकी येंय नं पिनेया ज्यापुतय्सं थ: धइगु मालेत स्वयाच्वंगु दु।

थ:गु समुदाय दुने थवंथवय् दथुइ थ:या भावना विकास यानायंकेत, ज्यापु समुदाययात अभ् धिसिलाक्क धस्वाकेत यल, खवप लगायत ज्यापुतलिसें नेवा: दुनेया मेमेगु समुदाययात नं क:घाना: यंकेमा:गु आवश्यकता खनेदु। थुकिया भवलय् ज्यापु दिवसया समारोहस ज्यापु प्रज्ञा व ज्यापु रत्न लगायत आपालं सिरपा: व सम्मान नं बीगु याना हयाच्वंगु ला दु। ज्यापु समुदाय जक मखुसे मेगु जातियात नं सिरपालं सम्मानित यायेगु छगू बांला:गु परम्पराया शुरुवात नं ख:। थुकिया लिसें मेमेगु

समुदाययात ज्यापु दिवसय् क:घाना वनेगु सोचयात अभ् बृहत दयेका वनेफत धा:सा ज्यापु दिवस हनेगुया आजु धातयें हे सार्थक जुइ।

ज्यापु दिवसय् ज्यापु संस्कृति विकास कोष यें बाहेक मेमेगु लागया ज्यापुतय् क:घायेगु वा गैर ज्यापुतय् नं क:घायेगु छगू विषय ख:सा मेमेपिं नेवा:तय्सं नं ज्यापु दिवसया स्वामित्व कायेगु अथवा धाये गैर ज्यापुतय्सं नं ज्यापु दिवसया थ:गु दिवस तायेकेगु खँ मेगु पक्ष नं विचा: यायेबहजु।

गैर ज्यापुतय्सं ध्व ला ज्यापुतय्गु दिवस ख: धका: उकी थ:त खंकाच्वंगु महु। तर व हे मनूतय्सं य:मरि पुन्हि व ज्यापु दिवस नापनापं ला:व:गु क्रिष्टमस धा:सा त:जिक हनाच्वंगु दु। क्रिष्टमसया तपुलिङ पुना:, थ:गु छेंया क्वथा, क्यव वा सडकय् हे क्रिष्टमसया सिमा थना: पश्चिमेलि संस्कृति हनाच्वं पिं नेवा:तय्सं ज्यापु दिवसं थ: व्यागलं तायेकेमा:गु आवश्यकता ला खनेमहु। ज्यापु धइपिं नं नेवा: हे ख:। नेवा: समुदाय दुनेया छगू जातीय पुचलं न्यायेकूगु दिवसय् मेम्ह नेवा: नं लय्ताये फयेकेमा:गु ख:। ज्यापु दिवसया हनेगु भवलय् येंय नं पिनेयापिं ज्यापुतय् लिसें नेवा: दुनेया मेमेगु समुदाययात क:घाना वनेफत धा:सा ज्यापु समुदाय हे बल्लाना वनीगु ख:। ज्यापु समुदाय बल्लाना वनीगु धइगु नेवा:त नं बल्लाना वनीगु ख:।

## वर्तमान परिस्थितिइ ज्यापुतय्गु च्यूता:.....

१ पेजया ल्यं

अथे हे पूर्व राज्यमन्त्री तीर्थराम डंगोल बैशाख महिनाय् व:गु त:भुखाचं भीगु छेंय् स्यंकाविल, असोज महिनाय् व:गु न्हूगु संविधानं भीगु मन स्यंका: विल। थ्व संविधानय् भीगु भासिक अधिकार छुं नं महु। राष्ट्रिय एकताया प्रति जुइमा:गु संविधान थौं एकपक्षिय जक जुल। भासिक अधिकार धइगु त:धंगु खँ ख:।

वहे भाषिक अधिकारया कारणं पाकिस्तान अलग्ग जुया बंगलादेश बनय् जुल। राजतन्त्र खतम जूगु नं इमिसं एकतन्त्रिय शासन या:गुलिं ख:। उकिं थ्व संविधानय् नं सकसितं हक अधिकार दइगु कथं संशोधन यायेमा:गुली ब:वियादिल। थुकिया नितिं भी सकलें छपं छथी जुया स: थ्वयेके माल। गबलेतक भीपिं राज्यसत्ताय् थ्यंके फैमखु उबले तक भीगु अधिकार दइमखु। उकिं भीपिं सचेत जुइमाल। स्थानीय निकायया चुनाव जुइवले भीपिं छधि

छपं जुया: भी मनूतय् यक्व त्याका छवयेमाल। भीसं नं राजनीति सक्रिय रुपं ब्वति कायेमाल। स्थानीय निकायलय् भीपिं नेतृत्वय् थ्यंकेमा:गुली ब:वियादिल।

ज्यापु महागुथिया सल्लाहकार डा.मृगेन्द्रलाल सिंह नेवा:तय्गु बानी व्यवहारय् ह्यूपा: हयेमा:गुली ब:विया दिल। नेवा:तसैं थ:गु पहिचानया वारे गर्व तायेका: वयात बचय् याना तयेगु कुत: यायेमाल। नेवा:तसैं थ:गु मांभाय् त्व:ता वनाच्वंगु दु। सरकारी जागिर नयेगु मस्वल। काय् म्थ्याय्पिन्त यक्व आख: व्वंकल अले अमेरिका, अष्ट्रेलिया, बेलायतथें जा:गु देसय् छवइगु। थथे जुइवलय् लिपा काय् म्थ्याय् नं महु जुया: बुढेसकाल कस्तकर जुजु वनाच्वंगु दु। थ्व संविधान ६०९ सभासदतसैं दयेकूगु ख: धा:सां स्वम्ह प्यम्ह खस आर्य नेतातसैं दयेकूगुलिं इमित फाइदा जुइगु कथं दयेकूगु धयादिल। कोषाध्यक्ष सरिता डंगोल सुभाय् न्वचु विया ज्याभव: क्वचायेकूगु ख:।



## ज्यापु दिवसय् किपूया निम्ह ब्यक्तित्व नापं छगू खल:यात सम्मान व सिरपा:



वंगु ने.सं.११३६ थिलाख्व योमरि पुन्हि खुन्हु ज्यापु संस्कृति विकास कोषं येँया बसन्तपुरय् त:जिक भिनिक्व:गु ज्यापु दिवस समारोह न्यायेकल। बसन्तपुरय् जूगू समारोहया न्ह्य: मरुत्वाले सांस्कृति बाजागाजा सहितया छगू त:धंगु सांस्कृतिक् य्वाली पिकया: येँया थ:ने क्व:ने लागाय् चाहुला: बसन्तपुर लागाय् त:जिक समारोह जुल।

राष्ट्रप्रमुखयात मूपाहाँ यायेगु परम्पराकथं प्रधानमन्त्री खड्ग प्रसाद ओलीया मूपाहाँसुइ न्ह्या:गु उगु समारोहलय् ज्यापु दिवसया लसताय् थीथी व्यक्तित्वपिं व खल: पुच:यात नगद सहितया सिरपा व सम्मान यायेगु ज्या नं जूगू ख:।

वाल प्रतिभा सम्मान एवं पुरस्कार— रिजन महर्जन— ओमबहाललाई सांस्कृतिक् वाद्य वादन, युवा प्रतिभा :— स्वास्थ्य शिक्षा :— डा. सुमन डंगोल ललितपुर चिकित्साशास्त्र (फिजियोथेरापि) शिक्षा :— डा. सुमनराज डंगोल ताहाचल— चिकित्साशास्त्र (नाक, कान, घाँटी) खेलकुद :— महेश्वर महर्जन —बाफल शारि्रिक सुगठन, सांस्कृतिक् :— सुदनमान मुनिकार— मुँ गल्ली— नृत्य/वाद्यवादन, पत्रकारिता :— श्रीकृष्ण महर्जन किपू —पत्रकार महिला सशक्तिकरण :— मयजु रश्मिला प्रजापति कुलेश्वर— समाजसेवा, ज्यापु रत्न :— डा. केशवलाल महर्जन कुमारीपाटी पाटन —कृषि अर्थशास्त्र

ज्यापु प्रज्ञा:— काशीनाथ तमोट वबरमहल— अनुसन्धानकर्ता ज्यापु विशेष सम्मान :— नेपाल सेना, सशस्त्र प्रहरी बल, नेपाल प्रहरी बाबुराजा महर्जन — पाटन — समाजसेवा ज्ञानेन्द्र कार्की— कामनपा वातावरण तथा प्रशासन तोइन्द्रराज सापकोटा —कामपा — हनुमानढोका दरबार क्षेत्र व्यवस्थापन, विमल ताम्राकार — ख्वप — भाषा व साहित्य, सुरेश मानन्धर — सुनार गाउँ — पत्रकारिता संस्थागत विशेष सम्मान ज्यापु महागुथि केन्द्रिय समितिया सिफारिसकथं काठमाडौं जिल्लाया उत्तर,

दक्षिण व पश्चिम भेग तथा ललितपुर व भक्तपुर जिल्लाया परम्परागत संस्थातमध्ये छगू संस्थायात रु.१०,०००/ नगद सिरपा बिया विशेष सम्मान या:गु ख: अथे हे फुक्क लागां छम्ह विशिष्ट मनुयात विशेष सम्मान या:गु दु। उत्तर लागा— इन्द्रायणी दापा खल:, टोखा, दक्षिण— थांबहा: दापा खल:, किपू, पश्चिम— सतुंगल बाँसुरी खल: सतुंगल, भक्तपुर :— न्हापांगु बाँसुरी खल: नगदे, ललितपुर — लाछी दापा खल: वुंगमती अथे हे व्यक्तित्वपाखे गुरु सुब्बा डंगोल, सांस्कृतिककर्मि रामभक्त महर्जन, किपू, सांस्कृतिककर्मि राजभाई महर्जन, सतुंगल गुरु



रत्नभक्त हैजु, नगदे, वाद्य गुरु रामभगत महर्जन, वुंगमती ख:। अथे हे नगद सिरपा: भिद्र: बज्रबाराही नेवा: पुच: टिस्टुङ, मिसा लिधंसा पुच: ओन्दे, गोंगबुं तग्व धिमे खल: गोंगबुं, नर:

मिसा पुच: नर: नास: पुजा धिमे खल:, सेरा, वाफल मरणोपरान्त विशेष सम्मान ज्यापु जातिया भाषा, धर्म, संस्कृति व विधि व्यवहार सम्बन्धि अध्ययन अनुसन्धान कर्ता ज्यापु पञ्च बलाछि त्वा:गुथि, काठमाडौंयात ब्यूगु

## भितुना ! भितुना !! भितुना !!!



भिनिक्व:गु ज्यापु दिवसया भूवलय् किपूया थांबहा: दाफा खल:यात संस्थागत विशेष सम्मानपाखें सम्मानित जूगुलिं थुगु खल:यात यक्व यक्व भितुना देछासैं लिपा लिपा नं नेवा: सांस्कृतिक च्वछायेगु ज्याय् च्वन्ह्यायेमा धका: भितुना देछायाच्वना।



भिनिक्व:गु ज्यापु दिवसया भूवलय् ज्यापु महागुथि किपूया जन्मका:छि ज: नापं केन्द्रिय पार्षद किपूया च्वमि रामभक्त महर्जन सांस्कृतिककर्मि विशेष सम्मानपाखें सम्मानित जुयादीगुलिं वय्क:यात यक्व यक्व भितुना देछासैं लिपा लिपा नं नेवा: संस्कृतिक च्वछायेगु ज्याय् च्वन्ह्यायेमा धका: भितुना देछायाच्वना।

## ज्यापु महागुथि

किपू नगर समिति सकल ज:



# ज्यापु महागुथिपाखें थुगुसी नं त्यःछिंत्यः फ्वन

नेवाःतयगु म्हसिकाया छगू तःधंगु नखः योमरि पुन्हि नं खः । योमरि पुन्हि विशेष याना न्हूगु वाः दुकाये धुंकाः वहे वाःयात जाकि याना, जाकि चूँल्य दुने चाकु तयाः दयेकीगु छगू प्रकारया नसा ज्वलं खः । थुगु दिनय् अन्नया भखारी पुजा यानाः भखारी छःने योमरी तइगु खः । स्वनिगःया दुने यक्व थासय् थ्व पर्व हनाः त्यःछिंत्यः फोनेगु चलन दु ।

किसानतय् नाप स्वापू दुगु थुगु यःमरि पुन्हियात ज्यापुतसें थःगु लजगाः व पहिचाननाप स्वापू दुगु तायेका थ्व दिंयात ज्यापु दिवस धकाः नं हनाः वयाच्वंगु दु । थ्व ज्यापु दिवस हनाः वयाच्वंगु नं भिनिदँ दत । तर किपूली धाःसा थ्व यःमरि पुन्हि अपायसकं नखःया रुपय् मानय् यायेगु चलन मदु । छाथधाःसा बखुमदः अस्तमिनिसें सुरु जुइगु न्हयगां जात्राया पाहाँ वनेहे वमचाःनिगुलिं थ्व मानय् यायेगु चलन मदु थें च्वं । यःमरि पुन्हिनाप ज्यापुतयगु विशेष स्वापू दुगु हुनिं ज्यापु महागुथि किपू नगर समितिं ने.सं.११३५ अर्थात थुगुने निसें किपूली नं त्यःछिंत्यः फ्वनेगु चलन सुरु याःगु खः । अबले किपू, पाँगा व नगांमय् त्यःछिंत्यः फ्वंगु खःसा, सकभनं तसकं उत्साहपूर्वक मनुत सहभागी जुगु खः । स्वनू तक याःगु उगु ज्याभ्वलय् केन्द्रिय नायो राजभाइ जकःमिया नेतृत्वय् केन्द्रिय समिति पाखेंयापि नं किपूली वया त्यःछिंत्यः फ्वंगु खः ।



वंगु बैशाख १२ गते वःगु तःभुखाचं मेमेथाय् थें किपू, पाँगा, नगामय् नं यक्व हानि नोक्सान यात । पाँगाय्ला धुसि, महाबो, लखु, दथः दिख्यः त्वाःत्वाःहे शुन्य याना बिल । अथे हे नगांया मूवस्ती लाछी त्वालय् निखा प्यखा बाहेक फुक्क फुक्क छेंत च्वने हे मजीक स्यन । भुतुली मिं च्याकेत, ग्यास मदु, मतचिकं मदु । मत मदु । थुज्वःगु संकटया घडी त्यःछिंत्यः फ्वनेला मफ्वनेला

जुयाच्वंगु अवस्थाय् ज्यापु महागुथि किपू नगरसमितिं भीसं सुरु यानागु थ्व ज्याभ्वः निरन्तर याना वनेमाःगु तायेकाः म्हिगः शनिवार पाँगाया छगू निगू थासय् व नगांया बालकुमारी छःया न्ह्यःने त्यःछिंत्यः फोनेगु ज्या जुल । अपायसकं ताउतक मफ्वसां कलाकारपिन्सं स्वपु प्यपू म्ये हालाः प्याखें ल्हुया क्यनेगु यात । थुलिं हे मनचिनाः थुगुसीया त्यःछिंत्यः फ्वः ज्याभ्वः वचायेकल ।

## सतःक्वय् हाकनं गथु प्याखं



भिनिदँय् पिथनीगु किपूया गथु प्याखं शुक्रवाः बहनी व शनिवाः न्हिनय् क्यंगु दु । किपूया सतःक्व लागाय् उगु कथंया प्याखं क्यनेगु ज्या याःगु खः । भैरव, गणेश, सिन्धा, ब्यान्वा, इन्द्रायणी, ब्रम्हायणी, महेश्वरी, कुमारी, गंगा, बाराही, काली सहितया थुगु प्याखं धइगु गं मखाःगु प्याखंया रुपय् नालातःगु दु ।

दबुलिइ क्यने मजिउगु थुगु प्याखं किपू लागायत माली आर्थत गथुतय्सं क्यना वयाच्वंगु खः । मल्लकालिनिसं क्यना वयाच्वंगु थुगु प्याखं धइगु असू क्वःथला देय् व जनताया नितिं भिं यायेगु सन्देश वियातःगु प्याखं खः । वंगु मोहनी नखःया चालखुन्हिनिसं पिथंगु थुगु प्याखं वइगु भलभल अष्टमी तक क्यनेगु याइ । दबःखिं बाजाया तालय् किपूया सतक्वय् थुगु कथं ख्वाःपाः प्याखं क्यंगु थ्व निक्वःखुसि खः । किपूया लायकुलिइ नं क्यने धुंकूगु थुगु प्याखं येंया लायकू व यलय लायकुलिइ नं क्यनेमाःगु चलन दु । तान्त्रीक व वैदिक निगुलिं दर्शन दुथ्यानाच्वंगु थुगु प्याखं किपूया मौलिक कथंया प्याखं खः ।

### ज्वज्वलपा वाःपौ

किपूलिइ शनिवाः सुस्त श्रवण सम्बन्धी जनचेतना ज्याभ्वः जूगु दु । नेपाल सुस्त श्रवण संघपाखें सुस्त श्रवण सम्बन्धि जनचेतना व्वलकेगु आजु तया ज्याभ्वः रवसाः रवःगु खः । किपूलिइ शनिवाः उगु कथंया ज्याभ्वः जूगु खः ।

थीथी ब्यक्तित्वपिं नापं किपूया संचारकःमितयगु उपस्थितिइ उगु कथंया ज्याभ्वः जूगु खः । नेपाल सुस्त श्रवण संघपाखें अथे संचार कःमित मुंका न्हापांखुसि याःगु उगु ज्याभ्वलय् नेपाल सुस्त श्रवण संघया नायः मचाभाइ महर्जनं आः

तक उगु संघपाखें याना वयाच्वंगु ज्याभ्वःया बारे नाप नापं भावि योजनाया बारे कनादीगु खः । उगु संस्थापाखे सन् २०१५ या दुने अपाडता जूपिन्त तालिम विइगुनिसं थीथी कथंया तालिम बियागु व थीथी कथंया ज्याभ्वः यानागु खः धकाः जानकारी विउगु खः ।

ज्याभ्वःया मू पाहाँ वीर अस्पतालया नाख काज घाँटी विभागया प्रमुख हुंडी राज पौडेल जुयादीगु खः । बाँलाक न्हयपनं

## सुस्त श्रवण सम्बन्धी जनचेतना ज्याभ्वः



मताइगु समस्या गथे याना जुइ, थुगु समस्याया अन्तरगत छु छु चरण दइ, अले थुगु समस्या म्त्वो याना यंकेगु नितिं छु छु यायेमाः धइगु वषयलय् मू पाहाँ पौडेलं न्ववानादीगु खः ।

सुस्त श्रवण जूपिनिगु अवस्थाय् विश्वय् हे गथे दु अले नेपालय् गथे दु धइगु विषयलय् अन्तर कृया केन्द्रित जूगु खः । ज्याभ्वलय् सुस्त श्रवण सम्बन्धि ज्याभ्वःत याःगुया नापं जनचेतनामूलक भिडियो व किपा नं न्हयब्वःगु खः

। नेपाल सुस्त श्रवण संघया अध्यक्ष मचाभाइ महर्जनं संघपाखें याना वयाच्वंगु ज्याया विषयलय् जानकारी बियादीगु खः । २०५३ सालय् निस्वंगु थुगु संघ बाँलाक न्हयपनं मतापिनिगु जीवन स्तर थकायेत थीथी ज्याभ्वःत न्ह्याका वयाच्वंगु दु । नेपाल सुस्त श्रवण संघपाखें आः याकनं हे ३० म्ह दुजःपिन्त अपाडता जूपिं मनूतय्गु अधिकारया बारे तालिम विइगु, २० म्ह दुजःपिन्त सुस्त श्रवण समन्धी अध्यन सपुयात लिम

विइगु, नेपाली सांकेतिक भाष कक्षात संचालन यायेगु, शिविर त संचालन यायेगु नापं थीथी कथंया ज्याभ्वः यायेगु जुइ धकाः नं धाःगु दु । किपूलिइ जूगु उगु ज्याभ्वय् किपू नापं नेपाःया सुस्त श्रवण सम्बन्धी विषययात कया थीथी कथंया सहलह ब्याकेगु ज्या याःगु खः । उगु ज्याभ्वः नाप नापं सुस्त श्रवण संघं याना वयाच्वंगु ज्यायात समाजया नितिं बांलाःगु ज्या जूगु दु धकाः मनूतय्सं टिप्पणी यानादीगु खः ।



### किपूया गथु प्याखं (गं मखाःगु प्याखं)

सफू बजारय् पिदने धुंकूगु दु थःगु प्रति सुरक्षित यानादिसं

### सफू दइगु थाय्

- १) खपया च्याम्हसिंहया स्टेशनरी पसः (श्याम सुन्दरया पसः)
- २) खप कमल विनायकया स्टेशनरी पसः
- ३) किपूया सतःक्वया स्टेशनरी पसः
- ४) किपूया देय् पुगूया बाघभैरव स्टेशनरी पसः
- ५) किपूया पांगा दोवाटोया किपू बूक प्वाइट
- ६) येंया भोताहिति नातिबज्रया पसः

७) येंया कुलाभुलिइ च्वंगु मंकाः धुकू पसः

८) यल, यल ध्वाखा अर्जुन स्टेशनरी पसः

९) कीर्तिपुर सन्देश वाःपौ व ज्वज्वलपा वाःपौया ज्याकू निखासि किपू, फोन नं. फोन नं.: ४३३३००७, ९८४१४०१०७७

९) स्वापू नितिं मेमेगु फोन नम्बरः ४३३४०१३, ९८४१७५२५८३, ९८४६०४६१२३९

मू

सच्छि तका जक (१००/-)

साहित्य/चिनाखँ

ज्यापु भी

प्रेम दास महर्जन

ज्यापु भी  
तुकि मत मखु  
मैन मत मखु  
मि ब्वाला जुया च्यायेनु  
त्वा: गां जक मखु  
देय् न्यंकं जजमान यायेनु ।



ज्यापु भी	
कू त्वःकू जक मखु	मुक्कं देय्या बुँखय् ।
कम्प्युटर ल्यापटप ज्वनेनु	
त्वा: बहा:या खँ जक मखु	ज्यापु भी
विश्वया खँ नं सीके नु ।	देय्या ज्यासलय् ल्यूने
	देय्या बुखँय् लिउने
ज्यापु भी	व त्यो थ्व त्यो भी मदु
देय्गू	आ: भी नं दनेनु
त्वा:गू पुन्हि गू	सकलसिया न्ह्यःने
सना गू जक मखु	ज्यापु जुयाया गौरव तायेका
भी मुना सहलह यायेनु	

सिइ हे म्वा:पिं

नाति महर्जन

अय् नेपा:देया महान नेता धा:पिं  
धेबा जक स्वया थ:त थ:म्हं तंकाजुपिं  
धेवा जक स्वया गुलि चोनेगु  
देसय् बांला:गु ज्या छक नं याना क्यने मालनि ।  
देश स्वर्ग थें यायगु घोषणा पत्र ज्वनाव:पिं  
आ:तक छुं मयासे तलब जक पचेयानाच्चपिं  
लुधंक सम्पति दय् धुंकल म्वाल ज्वना बनेगु छुं मदु  
छन्हू फुक्कँ तोता सिना बने मानि ।  
अय् गरिव निर्मुल याय धका व:पिं नेता छिपिं  
गरिबया दु:ख आतक मिखां मखँपिं  
धेबाया ल्यु ल्यु जक जुइमते म्वाल  
धेबा धइगु ल्हा:या खिती थें ला ख:नि ।  
अय् नेपा:यात सिंगापुर थें दय्क:व:पिं  
देशया फोहर छता हे थासय् तय् मफुपिं  
धेवा वैथाय् थ: हे बन्ह चोना जुइमते  
आम धेवां छिमित लिपा खिचाँ ल्यूथें लिना न्याइ तिनि ।  
अय नेपा:या कुबेर नेतापिं  
धेबाया लागि सी हे म्वा:पिं थें सनाजुपिं  
देश सीबय् धेवा त:धंगु मखु धैगु सिका  
देश विकासया ज्याय न्ह्या: बने मालनि ।  
अय् सि हे म्वा:पिं नेता नेपा:यापिं  
न्ह्याकक्व: सम्पति दत नं मगा:पिं  
जिन्दगीया छुं थेगान थौ खँम्ह कन्हे मदु  
छँबुँ सम्पति फुक्क तोता खुकु हाक कापते हिना बने मानी

न्ह्याक्व सम्पति दुसां गाईमखु  
धेबाया भखारी दसां लुधनि मखु ।  
न्ह्याक्व द:सां नुनि मखुपिं जुया  
मनु धका धया त:गु ख:नि ।  
सन्तोष जुइगु लि हे सुख धैगु सीकी  
लोभ यातकि लिपा विलाप याये मालीगु थुइकि  
अति धैगु छुं नं बांमला:  
अति जुया हे न्हापायापिं शासकतय् जुल थ्व गति  
यक्व दु देय् कंगाल जुइक कमाय् या:पिं  
फक्व कमाय याना दे नांगा याना ब्यूपिं  
श्री ५ श्री ३या पालेनं यक्व दु गरिव स्याना  
लुँ वहया अप्पां धुकु जायका त:पिं ।  
इपिं न्र लुँ वह मज्व:सें सिना हे वन  
गथे वल अथे हे पचिं नांगां हे वन  
न्ह्याक्व सम्पति दु धका फुई याना छुयाये  
आखिरे पाप धर्म सिबे मेगु छु यने खन ।  
सम्पति धैगु न्ह्याक्व द:साँ मगा:  
धाय मफु गुलि गा: गुलि मगा:  
सम्पति किच: थें भी वँ वँथाय् यने दैमखु  
छन्हुला तोता मवँसे मगा ।  
दिन धैगु सदां छगु थें जुइमखु  
थौं सुर्छौं लुया च्वंगु सर्गते कन्हे सुपाँयचं नं तोपुई फु  
सम्पति दु धायेवं देशप्रतिया कर्तव्य लोमंके मते  
थौं जुजु जुयाचौंम्ह कन्हे धाक्रे नं जुइफु ।  
भिंगु ज्या या:सा सकसिनं जयजयकार याई  
मभिंगु ज्या या:सा धिक्कार धाई  
सिना बनेमानि धका सिका बांला:गु ज्या यायेगु स्वसा  
लिपा नेपा:या इतिहासे ना चोय दई ।

व्यवहारिक जीवन न्ह्याकेत मदयेकं मगा:गु शिक्षा

नास: (न्वचू, उद्घोष व एफ एम संचालन कला)

समाचार

मनूत नाप प्रत्येक्ष बाय् अप्रत्यक्ष रुपं सरोकार दइगु चासो तइगु फुक्क कथंया न्हूगु घटना वा विषय हे समाचार खः । सामान्य तया क्रमभंग अर्थात निरन्ततायात त्वा: द:गु धइगु हे समाचार धका: थुइकेमा: । अले क्रमभंग जूगुयात निरन्तर रुपं प्रशारण याना बनेगु नं समाचार हे खः । समाचार धइगु सामान्यतया निगू कथंया दइ । न्हापांगु समाचार धइगु क) घटना प्रधान अले निगूगु समाचार धइगु ख) विषय प्रधान समाचार खः । गुलि तःधंगु घटना जुल बाय् गुलि तःधंम्ह मनू जुल उलि

हे तःधंक थाय् बिया प्रशारण याइगु समाचार हे घटना प्रधान समाचार खः । तःधंम्ह मनू नाप स्वापू दुगु गतिविधि बाये छुं नं न्हूगु घटनायात हे घटना प्रधान समाचार धइगु खः । अःपुक धायेमाल धा:सा घटनायात प्राथमिकता बियात:गु समाचार धइगु हे घटना प्रधान समाचार खः । ख) विषय प्रधान समाचार छुं नं घटना वा वस्तुया चित्रण यायेगुसिबें नं उगु घटना बाय् विषयया प्रक्रिया व उकिं लाइगु लिच्च:यात प्राथमिकता बिइगु समाचार धइगु हे विषय प्रधान समाचार खः । घटना प्रधान व विषय प्रधान समाचार या नमुना

संविधानसभाया नाय: सुवासचन्द्र नेम्वाङं किपूया क्वय्ना लागां सैबु नाप स्वा:गु ताँ थौ उलेज्या यानादिल । ताँया उलेज्यायासँ मूपाहां संविधानसभाया नाय: नेम्वाङं न्हूगु नेपा: दयेकेगु भ्बलय् उगु ताँपाखें नं छगू कथंया न्हूगु उर्जा बिइगु विश्वास प्वंकादिल । स्थानीयवासी व थीथी दातृ संस्थातय्गु ग्वहालिं निर्दं तक मदिकक ज्या याना मोटर यंके ज्यूगु कथंया उगु ताँ दयेकूगु खः । ज्याभ्बलय् किपू लागाया सभासद् दिलिप महर्जन नापं थीथी ब्यक्तित्वपिं उपस्थिति जुयादीगु खः । विषय प्रधान समाचार किपूया क्वय्ना लागाय् स्थमानीयवासी दिपक महर्जन थौ

तसकं लयेता:गु दु । क्वय्ना व सैबु स्वा:गु मोटर बनेगु ताँ थनिनिसें संचालन जूगु खँ न्यना वय्क: थौं उखेपाखे बनादीगु खः । थ: मचा खनाया छगू स्कूलय् तयात:गु अले उगु स्कूलं सैबुइ तक गाडिया व्यवस्था या:सां नं अन ताँ मदया समस्या जूगुलिं न्हिया न्हिथं सैबुइ तक न्यासि बना मचा का:वनेमा:गु बाध्यता दुगु खः । आ: सैबु व क्वय्ना स्वा:गु ताँ दयेकूगुलिं महर्जनया मचायात तया हइगु स्कूलया गाडी थ:गु छँ क्वय् तक हे वइगु जुल । उकिं दिपक न्हिया न्हिथं मचा त:वनेगु व का वनेगु ज्याय् अलमल जुयाच्चंगु ख:सा आ: अथे अलमल जुइमा:गु अवस्था मन्त । दिपक ला छम्ह पात्र जक ख: वय्क: थें हे समस्या जुयाच्चपिं यक्व हे मनूतय्गु नितिं क्वय्ना

सैबुया ताँ दयेकूगुलिं लसताया खँ जुया बिउगु दु । समाचार प्राथमिकताया तत्व समाचार धइगु न्यनामिपनिगु नितिं खः । उकिं समाचारं न्यनामिपिन्त गुगु कथं आकर्षित यायेफइ धइगु खँय् ध्यान तयेमा: । समाचारपाखें न्यनामियात साला कायेगु नितिं प्राथमिक तत्व धायेबलय् निकटता, सान्दर्भिकता, प्रधाव, महत्व व मानविय अभिरूचि धका: थुइकेमा: । १) निकटता छुं नं विषय बाय् घटना निकटता दत ध:सा न्यनामिपनिगु तसकं ध्यान वनी । निकटता नं स्वंगू कथंया दइ । क) भौगोलिक निकटता, ग) स्वार्थगत निकटतता क) भौगालिक निकटता थ:गु त्वा:, गां, शहर, देय् बाय् थ:गु ज:ख:या घटना व खँ धइगु भौगोलिक निकटता खः । न्यानामिपनिगु नितिं राष्ट्रिय अन्तर्राष्ट्रिय समाचारसिबें थ:गु थाय्बाय् व स्थानीय समाचार जुल धा:सा यक्व चासो दइ । थ:गु त्वालय् छँ छखा दुनाव:गु हे त:धंगु चासोया सचाचार जुइसा विदेशय् भिखा छँ दुनावल धा:सां त:धं ताइमखु । विश्व समाचारया ल्याखं स्वल धा:सां भारतया समाचायात गुलि चासो तइ उलि जर्मनया समाचारयात चासो तइमखु । कथंहं.....



## वैवाहिक प्रतिबद्धता व भिंतुना समारोह



नेपाल फेमिली फेडरेशननं  
एकता मेलमिलापया नितिं  
समर्पित संस्था वंगु पुस ११  
गते पाँगा पार्टी भेन्यूसं छगू  
सरमोहरया दथुइ वैवाहिक  
प्रतिबद्धता व भिंतुना समारोह  
या:गु दु ।

पाँगा महिला बचत तथा  
ऋण सहकारी संस्था लि.या  
साधारण सभाया लसताय  
लाका उगु सहकारीया शेयर  
दनी दुज:पिनि त्युयात ब्वना  
अज्व:गु कथंया ज्याभव:

या:गु ख: । उगु समारोहरलय्  
थ्यंमथ्यं ख्वीगू प्रतिशतसिबें  
अज्व: मिसापिन्सं थ:थ:पिं

भात ब्वना ज्याभवलय्  
सहभागी जुयादीगु ख: ।  
इमि दथुइ कला भातं ल्हा:  
ज्वनेगु व खादां न्ययेकेगु व  
वैवाहिक प्रतिबद्धता प्वंकेगु  
या या:गु ख: । अनं लिपा  
हिन्दु धर्म व बौद्ध धर्मका  
गुरुपिन्सं भिंतुना  
देखायादीगु ख: ।

मुसुबहालय् एकिकृत वस्तिया  
नितिं त्वा: भेला

एकिकृत वस्ति पुन: निर्माण अभियानं शनिवा: १२ वडाया मुसुबहालय् त्वा: भेला यात । १२ वडाया  
मुसुबहालय एकिकृत वस्ति पुन: निर्माण यायेगु अभियानं कथं थुकथं भेला या:गु ख: ।

उगु भेलाय् बरिष्ठ ई. सूर्य भक्त सागेछेंय् एकिकृत वस्ति पुन: निर्माणयात कया: नुग: खँ तयादीगु  
ख: । वयकलं एकिकृत वस्तिया नितिं दकलय् न्हापां त्वा:बायापिं छप्पं जुइमा:गु आ:या स्थिति एकिकृत  
वस्ति पुन: निर्माण यायेगु बाहेक मेगु बिकल्प मदुगु विचा: प्वकादीगु ख: ।

उगु ज्याभवलय् एकिकृत वस्ति पुन: निर्माण अभियानया कजि मचाराजा मर्हजन, यँ महानगर  
पालिकाया दलीय प्रतिनिधि भगवान शाक्य, नेपाल मण्डल राहत अभियानया दुज: सुजिव वज्राचार्य  
लिसें १२ वडाया न्हयलुवा: बालकृष्ण मर्हजन एकिकृत वस्ति पुन: निर्माणया सम्भावना यात कया:  
न्ववानादीगु ख: । ज्याभव: सुरेन्द्र वज्राचार्य न्ह्याकादीगु ख: ।

## वडगु पुष २५ गतेनिसें संकिपा महोत्सव याइगु



थ्वहे वडगु पुस २५ गतेनिसें  
नेपालभाषा संकिपा महोत्सव  
त:जिक न्ह्याइगु जूगु दु ।

संकिपा महोत्सवया कजिलिसें  
नांजा:म्ह संकिपा निर्देशक  
कलाकार सुरेन्द्र तुलाधरं नेवा:

संचारक:मितलिसे खँ ल्हासे उगु  
जानकारी बियादीगु ख: ।

नेपालभाषा संकिपा समाजया  
ग्वसालय जुइत्यंगु उगु संकिपा  
महोत्सव त:जिक हनेगु नितिं भाजु  
तुलाधरं सकलसित ब्वति कायेत

इनाप यानादीगु दु । वयकलं थ्वहे  
पुस २४ गते संकिपा महोत्सवया  
उलेज्या जुइत्यंगु व कन्हयकुहु पुस  
२५ गते न्हापांगु संकिपाकथं 'मू  
मदुगु जिन्दगी' क्यनेगु जानकारी  
नं बियादिल ।

थथे संकिपा महोत्सवया न्हापांगु  
संकिपा 'मू मदुगु जिन्दगी'  
सुथसिया ८ ता इलय् १२ ता  
इलय् व २ ता इलय् याना: खंगू  
शो क्यनेत्यंगु ख: ।

भाजु तुलाधरं संकिपा  
महोत्सवकथं न्ह्याकेत्यनागु थुगु  
नख: लय् छगू छगू मद्दिक्क  
नेपालभाषाया संकिपा दच्छियकं  
क्यनेगु ज्याभव: दूगु जानकारी विसें  
संकिपाया टिकटया कुपन मू:  
२६०० (तीखुस: तका) तइगु  
जानकारी बियादिल । थुगु  
कुपनपाखें दच्छियकं १२ गू संकिपा  
स्वयेफइगु जानकारी नं  
बियादिल । उगु कथंया महोत्सवय्  
नं ग्वहालि यायेत इनाप या:गु दु ।

अशोक हल्य  
'मनू म्हसिकी'  
संकिपा प्रिमियर शो

शनिवा: यलया अशोक हल्य 'मनू म्हसिकी' नेपालभाषा संकिपा  
प्रिमियर शो जुइत्यंगु दु । सथय् ११ ता: २ याना: निगू शो क्यने  
ज्या: जुइत्यंगु ख: ।

नेपालभाषा संकिपा ख्यलय् नेवा: भाषा, कला, संस्कृति सम्बर्द्धन,  
प्रवर्द्धनया नितिं नीस्वंगु नेपालभाषा संकिपा समाज स्वदं फुना:  
प्यदं क्यंगु लसताय थुगु ज्याभव: यायेत्यंगु ख: । समाजं न्हापांगुखुसि  
'नेपालभाषा संकिपा महोत्सव ११३६-३७' ज्याभव:या नितिं दुध्याइपिं  
समाजया न्हापिं दुज:पिन्त म्हसीका पौ ल:ल्हायेगु ज्याभव: नं  
तया:त:गु दु ।

तपाईको टोलमा भएका घटना कीर्तिपुरको समाचार बनाउने  
हो भने तपाई एक कल फोन गर्नुस् हामी तपाईको टोलको  
समाचार कीर्तिपुरको समाचार बनाईदिनेछौं

कीर्तिपुरको  
चित्रण



किपुलिं पिदनाच्चंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३  
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखँ/हाइकू विज्ञापन  
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७,  
९८०८६२६४२० ई-मेल : kirtipur\_sandesh@live.com